

## 2 PEED

Ta jawén Jesus hã h'yy ka'eeh do hã Peed ma erih do hahÿÿh

**1** Simaw Peed, Jesus Kristo karom, ta mejũũ do see ÿ ti hÿÿh. ÿ edëng bëeh, ãã nemuun Jesus Kristo hyb n'aa P'op Hagã Do hã h'yy ka'eeh doo. Baad had'op ti Jesus Kristo P'op Hagã Do ër h'yy kaha'eeh doo, ër h'yyb tym dëëb. Baad had'op tabahadoo do hyb n'aa ër hã tabanoo P'op Hagã Do hã ër h'yy ka'eeh hyb n'aa. Tak'ëp baad ub ta ti ër h'yy ka'eeh do ër hã tanoo doo. <sup>2</sup>P'op Hagã Doo, Jesus ër Wahë N'aa na-ããj hë bë bahapäh do hyb n'aa bë h'yyb gó, ÿ karën tak'ëp P'op Hagã Do ky enyym bë wë, ÿ karën baad had'yyt hë bë tah'yyb en'yym.

**Tak'ëp ji hyb n'aa tam'aah baad had'yyt hë  
ji bawät hyb n'aa ky n'aa hahÿÿh**

<sup>3</sup>Ta hejój me P'op Hagã Do an'oo däk ër hã sahõnh hë baad hadoo doo, ji bahajaa hyb n'aa papuuj gó, takarën doo da ji bawät hyb n'aa. Ta ti tawén n'oo däk ër hã, Kristo, ër tanaëëj wät do ër hapëë däg kãn do hyb n'aa ër h'yyb gó. Ta kabaj'aa doo me, tak'ëp taky enyym doo me ër tanaëëj wät ta karapee ër bahadoo hyb n'aa. <sup>4</sup>Ta kabaj'aa do hyb n'aa, tak'ëp taky enyym do hyb n'aa na-ããj hë, tak'ëp baad hadoo doo, tak'ëp ji kamahãn do taky däng paa ër hã. Ta ti ër hã taky däng do an'oo bã, baad P'op Hagã Do bawät doo da ër babok hyb n'aa. Ër hã taky däng do tan'oo bã na-ããj hë ër bedëp hyb n'aa, Jesus hã h'yy kana'eeh do sa h'yyb karejãã do mahãnh. Nesaa do ji h'yyb säg karën do jawén rababok do hyb n'aa sa h'yyb karejãã tii.

<sup>5</sup>Ta ti hyb n'aa né hë, taw'ãäts hë tak'ëp bë hyb n'aa tam'aah takah'üüm hyb n'aa bë h'yy ka'eeh doo. Taw'ãäts hë baad had'yyt hë bë babok. Taw'ãäts hë bë hyb n'aa tam'aah bë h'yy ganäng hyb n'aa P'op Hagã Do karën do hã. <sup>6</sup>Taw'ãäts hë bë h'yyb bë mesoo, bë h'yyb karën do jawén bë nabok hyb n'aa. Taw'ãäts hë h'yy ganajëng doo me bë baboo had'yyt hë. Taw'ãäts hë P'op Hagã Do karën doo da bë babok. <sup>7</sup>Taw'ãäts hë bë kamahãn bë wakãän hedoo doo, bë nemuun Jesus hã h'yy ka'eeh doo. Taw'ãäts hë bë kamahãn sahõnh hë ta wób. <sup>8</sup>Sahõnh hë ta ti takahüüm bã had'yyt hë bë h'yyb gó, dooh daap hë tado da tii bã Jesus Kristo, ër Wahë N'aa bë hapäh doo. Baad hadoo ta hanaa tii. <sup>9</sup>Tii d' nado

ÿ etsén wät doo da nabok do hã. Baad rabanahapäh do hadoo tii. Ty temah do hadoo.<sup>a</sup> Ramabaan nesaa do sa hã hanäng do paa kawug hõm doo. <sup>10</sup>Ti hyb n'aa, wakãn haa hedoo doo, taw'ãäts hẽ ta bahãnh bë hyb n'aa tam'aah, P'op Hagä Do naëej wät do wób né bëeh, bë metëeh hyb n'aa, P'op Hagä Do asëew hõm do wób né bëeh, bë metëeh hyb n'aa. Sahõnh hẽ ta ti bë hã ÿ ets'ëe wät do bë moo boo bã, dooh né da bë h'yy keréd hõm bã P'op Hagä Do hã. <sup>11</sup>Tii bã, baad bë P'op Hagä Do gadoo da Jesus Kristo, ër Wahë N'aa, ër h'yyb tym dëeb tabagã had'yyt doo bã.

**Te hub né hẽ Jesus mejüü do rama metëek do ky n'aa hahÿyh**

<sup>12</sup>Bë hapëe däg né paawä bë ÿ ma erii wät do ky n'aa, baad bë gado däg né paawä bë h'yyb gó baad hadoo do ky n'aa bë rama met'ëeg wät doo, ÿ karën bë hyb n'aa es'ee had'yyt hẽ ta tii. Dooh ÿ h'yy gajëe hõm bã bë ÿ maher'oot doo, bë manabaan hyb n'aa. <sup>13</sup>Hã ÿÿ, taw'ãäts hẽ tii da bë ÿ maher'ood had'yyt hẽ badäk hahÿÿ bã ÿ bawät nä bã, <sup>14</sup>edaa däk ÿ bahapäh do hyb n'aa badäk hahÿÿ bã ÿ bawät do gawatsik. Ër Wahë N'aa, Jesus Kristo metä wät ta ti hã ÿÿ. <sup>15</sup>Edaa däk ÿ dajëp doo. Ti hyb n'aa ÿ karën sahõnh hẽ ÿ moo wät ÿ hajaa doo, badäk hahÿÿ bã ÿ bawät nä bã, ÿ dajëp jawén paa bã na-ãäj hẽ bë hyb n'aa es'ee had'yyt hẽ hyb n'aa ta ti bë ÿ maher'ood wät doo.

<sup>16</sup>Ër Wahë N'aa Jesus Kristo hejój ky n'aa bë ãã maher'oot noo gó, p'aa hënh da tamatëeh bë ãã maher'oot bã, dooh sa panyyg ub h'yy ganny gó sa daaj hẽ rahyb n'aa newëe do ãã ky s'üüd bã. ãã daaj hẽ né hẽ ãã matym me ãã bahapäh tak'ëp ta kabaj'aa doo, <sup>17-18</sup>waëe P'op Hagä Do wë kasëew hõm do jó. Ta tii bã P'op Hagä Doo, ta Yb, weh'ëeh ta hã, ta bag tak'ëp gabarëeh doo gó tabawät tabanoo na-ãäj hẽ. Hahÿÿ da P'op Hagä Do kyyh ta hã: “Hahÿ tah ÿÿ, tak'ëp ÿ kamahãnh up doo. Baad ÿ h'yy gadajang ta wë”,<sup>b</sup> näng mäh. ãã daaj hẽ ãã maa napäh ta kyyh, Jesus sii ta tii bã ãã bab'ëeh bã.

<sup>19</sup>Ta ti ãã bahapäh, ta ti ãã maa napäh do hyb n'aa na-ãäj hẽ, ta bahãnh baad ãã bahapäh te hub né hẽ Kristo matëeh do ky n'aa hã P'op Hagä Do ky n'aa rod rerih do paah. Ti hyb n'aa ÿ karën paawä baad bë hyb n'aa matakä Kristo ky n'aa rerih do paa hã.

<sup>a</sup> 1.9 Dooh rah'yy gah'ood bã P'op Hagä Do karën do hã, tahanäng pé tii.

<sup>b</sup> 1.17-18 Matew 17.5, Maah-Ko 9.7, Rukas 9.35

Ta bag atsëm ta tyw n'aa ji hã tametëeh do hadoo rerih do paah. P'op Hagä Do ky n'aa rod rerih do hã bë hyb n'aa matakä bä bë da hapäh ny hadoo do ji ky daheeh, ny hadoo do noo kanesa doo. Taw'ääts hë rerih do bë ky dahé had'yyt hë Kristo matëeh bä kä. Tii bä kä, baad Kristo bë da tah'yy gan'yyh P'op Hagä Do hã. Watom tapaj'ëë bä hana do hadoo bë hã Kristo. <sup>20</sup>Hahÿ ti baad ÿ karën bë hyb n'aa newëë: Dooh sa hanaa tado bä P'op Hagä Do kyy kerih doo gó ta ky n'aa rod rerii bong do paah. <sup>21</sup>Dooh sa hanaa tado bä ta jawén hawät do ky n'aa raheer'oot do paah. P'op Hagä Do Sahee h'yyb mahũüm paa tii, P'op Hagä Do kyyh ramaher'oot hyb n'aa.

### Ma matëg oow ky n'aa hahÿÿh

**2** Isaraéw buuj mahang P'op Hagä Do ky n'aa rod oow, noo kanesa doo, rababong do paa hadoo, bë mahang na-ääj hë ti anäng da ma matëg oow. Ky kamep'ëeh doo me rama metëek da te hub nadoo doo. Kristo, sa kariw n'aa, sa danäh, tadajëp doo me tedëeb wät do sa hã, ramakyyis da. Jé sa kyyh maa newëë do reréd hõm da Jesus hã rah'yy ka'eeh do paah. Ti hedoo do ma matëg oow nayyw hë sa daaj hë sa ky n'aa katakyyk baad nadoo do hã. Gawatsig hõm da. <sup>2</sup>Hajök da ky s'ũüt ma matëg oow. Nu meby n'aa näng do ma matëg oow ramoo bok do ramoo bok da na-ääj hë. Sa hyb n'aa Jesus hã h'yy kana'eeh do baad nadoo doo me raheer'oot da ta tyw n'aa heh'äät doo. <sup>3</sup>Tak'ëp ta sãm hã rah'yy kajäk do hyb n'aa, sa panyyg sa daaj hë rahyb n'aa newëë doo me ma matëg oow bë da rawedii, bë wë hanäng do bë anoo hyb n'aa sa hã. P'ooj däg P'op Hagä Do h'yyb dëë däk nesaa do hã taky n'aa etyy ta tii. P'op Hagä Do rejää né da tii. Dooh da rakedëeb bä. <sup>4</sup>Dooh P'op Hagä Do t'yyd mehĩn bä ääs wób p'ooj ub nesaa do moo bok doo. Tabanesaa hënh tadewäts bëeh tii, t'öp gadagyp doo gó. Ta tii bä ragada P'op Hagä Do ky n'aa etyy noo gó sa hã. <sup>5</sup>Dooh na-ääj hë P'op Hagä Do t'yyd mehĩn bä ta hã waneh'ëeh do p'ooj ub habok doo, hag'yyp do tamejũũ noo gó sa wë. Jããm hë Nowéh tabed'ëep naëng hag'yyp do mahãnh, setsi ta sii habok do sii hë. Nowéh tii, ta wób tamaher'ood had'yyt hë P'op Hagä Do karën doo da rababok hyb n'aa paawä. <sup>6</sup>P'op Hagä Do ky n'aa etyy paa panang Sodoma, Gomoha häd enäh do ta babuj n'aa sii hë tëëg hõo me, sahõnh hë tagawatsig hõm hyb n'aa. Jããm hë ta ooj mad'aak paah, tak'ëp hadoo do tamo haj'aa haj'aa. Sa hã tabad'oo

do hã tametëeh nyy da tamoo wät da P'op Hagä Do waneh'ëeh do sa hã. <sup>7</sup>Jããm hë panang buuj mahang tabed'ëep Róh, baad ub, P'op Hagä Do karën doo da hawät doo. Tak'ëp Róh h'yy katón paa tak'ëp baad nadoo do nanäng P'op Hagä Do ky n'aa jaw'yyk do ky nadah'eeh do ramoo bong do hyb n'aa sa hã hanäng doo me. <sup>8</sup>Sa mahang Róh bawät paah. Ta ãh hã had'yyt hë Róh, P'op Hagä Do karën doo da hawät do ahoop paa ta h'yyb gó, tahapäh do hyb n'aa, tamaa napäh do hyb n'aa na-ãäj hë nesaa do panang buuj ramoo bok doo. <sup>9</sup>Hỹy kã, ta tii da P'op Hagä Do t'yyd manehiïn do hyb n'aa paa nesaa do moo heb'ooh doo, tii da tabed'ëep do hyb n'aa paa baad habok doo, ji hapäh hahỹh: P'op Hagä Do hajaa né hë takarën doo da habok do tabed'ëep hejoonh do sa hã kametty do mahãnh. P'op Hagä Do hajaa na-ãäj hë tarejã had'yyt hë nesaa do moo heb'ooh doo, sahõnh hë taky n'aa etyy noo gó kajaa bã kã.<sup>c</sup> <sup>10</sup>Tarejãã do mahang tak'ëp sa bahãnh tarejãã da nesaa do sa h'yyb säg karën do jawén habok do hyb n'aa nu meby n'aa näng do sa hã hanäng doo me moo bok doo, baad nahado bong do hajaa do P'op Hagä Do matym gó. Sa bahãnh P'op Hagä Do rejãã da tamejũũ do mak'yyis doo.

Sa hã hë ma matëg oow rah'yy kasab'ee. Rah'yy karën doo da ramoo bok. Dooh raky daheeh péh. Dooh rajeỹm pé ta tii. Ti hyb n'aa, dooh rajeỹm bã kabaj'aa do nes'aa padëek do raky n'aa rejã bã. <sup>11</sup>Ããs kã, ma matëg oow sa bahãnh hejooj né paawã, sa bahãnh rahyb n'aa jewyg né paawã, dooh raky n'aa rejãã doo me Tak'ëp Hyb N'aa Jawyk Do matym gó raky n'aa tapa bã kabaj'aa do nes'aa padëek doo. <sup>12</sup>Har'ëeng hadoo ti ma matëg oow. Dooh har'ëeng rah'yy genã bã. Ti abong har'ëeng ji masoo hyb n'aa, ji nabooh hyb n'aa. Har'ëeng h'yy ganenäh do hadoo ma matëg oow y wén näng, tak'ëp baad nadoo doo me rabaher'oot ranahapäh do hã. Ti hyb n'aa P'op Hagä Do gawats'iik da tii, har'ëeng ji nabooh do hadoo. <sup>13</sup>P'op Hagä Do rejãã da ta tii, ta wób rarahejãã do mabaj. Baad ub sa hã pé adëb bã sii hë rah'yy karën doo da rababok, baad nado né paawã, nu meby n'aa nyy né paawã ti rah'yy karën doo. Séd hã bë bawëh noo gó ragen'aak baad nadoo do sa h'yyb säg karën do ramoo bok bë sii rawëë bã. Baad nado ta wób raher'oot da bë ky n'aa tii d' bë mahang rababok do hyb n'aa.

<sup>c</sup> **2.9** Jesus matëeh noo gó P'op Hagä Do ky n'aa etyy da sahõnh hë badäk hahỹy hã habok do paah, ããs sii hë. Nesaa do moo heb'ooh do taky n'aa etyy da banesaa hënh rahob had'yyt hë hyb n'aa. Nahëej tii bã rahoop doo.

Tak'ëp bë nu mebyk ran'oo bã. <sup>14</sup>Ỹÿj sa patug wad'ii do hã rah'yyb padëëk had'yyt hë sa wë rababok hyb n'aa. Dooh reréd nesaa doo. Rah'yyb tatuk sa da rah'yyb hedoo hyb n'aa P'op Hagä Do kyyh baad nahapäh do hyb n'aa nyyw hë h'yy keh'ÿÿt doo. Sa h'yyb ramet'ëëg däk, sa h'yyb karën do rahyb n'aa h'üüm hyb n'aa. P'op Hagä Do ky n'aa was'ee padëëk do tii! <sup>15</sup>Reréd hõm ta tyw n'aa baad hadoo doo. Ti hyb n'aa baad nadoo do jawén rababoo däk. Barãm, Beor t'aah, p'ooj ub hawät do mo n'aa me rabad'oo. Tak'ëp Barãm h'yyb däk paa ta sãm hã, Isaraéw buuj majiĩ ta hã raky kajäk doo, Isaraéw buuj taky n'aa wasee hyb n'aa paawä. <sup>16</sup>Ta sãm, ta hã raky kajäk do jawén tabahõm bã, ta tyw n'aa baa bã, P'op Hagä Do nabuuj gedoo mä ta hã. Hahÿÿ d' paa tii: Jumeto, ta mas'ää tajawät doo, aj'yy kyy me tamaher'oot paah, dooh né paawä jumeto rahaja bã raheer'ood bã. Jumeto meduuk P'op Hagä Do ky n'aa rod Barãm häd näng doo, tamoo nawät hyb n'aa tak'ëp baad nadoo doo.

<sup>17</sup>Naëng k'ääts gó naa ganyyh do mawooj däk do hadoo ta ti ma matëg oow. Naëng poo mahauk do tabës do hadoo. Ji wad'ii do tii. Ti hyb n'aa P'op Hagä Do enyyw däk sa hyb n'aa tak'ëp badagyp doo, tadowäts bëëh hyb n'aa gadagyp doo gó. <sup>18</sup>Daap hadoo do ti raheer'oot doo. Ti hadoo né hë, kyyh tak'ëp hetsooh do rakamasab'ee do ji ramaher'oot, ta tii me rah'yyb tatuk hyb n'aa nag'aap hë baad nadoo do habok do mahãnh kedëëb bong doo, nag'aap hë Jesus hã h'yy kae padëëk doo, baad P'op Hagä Do kyyh hã h'yy ganenäh nä doo. Tahajaa, näk mä sa kyyh, ji äã bã ji ÿÿm, ji patug nadoo do sii ji h'yyb säg karën doo da né hë. Ta tii da rah'yyb tatuk sa hã. <sup>19</sup>Hahÿÿ da raky kajäk sa kyyh maa newëë do sa hã: “Äã ma metëëk do bë gado bã, baad ub da bë babok tii bã. Dooh mejõ wät pé bë hã”, näk sa kyyh. Tii d' né paawä ta wób hã raky kajäk, nesaa do sa h'yyb karën do karom ti ma matëg oow. Nesaa do mejõ had'yyt hë sa hã. Bë hyb n'aa newë hahÿÿh: Ji hã j'aa ketsë doo, ti né hë ji hã mejüü doo. Nesaa do sa h'yyb karën do j'aa ketsëë däk sa hã. Ta ti sa hã mejüü do ti ramoo boo had'yyt hë. <sup>20</sup>Hahÿÿ hyb n'aa ÿ wén her'oot ta tii da sa ky n'aa hã: Pooj jé ër Wahë N'aa, ër h'yyb tym dëëb, Jesus Kristo rabahapäh do hyb n'aa sa h'yyb gó, reréd hõm dó nesaa do badäk hahÿÿ hã habong do P'op Hagä Do hã h'yy kana'eeh do rabahed'oo doo, baad nado wäd ji bahadoo hanoo doo. P'aa hënh kä ta ti nesaa do j'aa ketsëë bã sa hã, p'aa hënh nesaa do ramoo bok do hyb n'aa, tak'ëp baad

nado boo h̄ȳy k̄a, p'ooj ub baad nadoo do rababok do bah̄anh k̄a. <sup>21</sup>Taw'āāts h̄e paawā ranahapāh baad hadoo do ta tyw n'aa P'op Hagā Do w̄e ji tamahūūm doo. Dooch né paawā baad tado bā ji nahapēē bā ta tyw n'aa baad hadoo doo, sa h̄a paawā taw'āāts h̄e tii. Hah̄y hyb n'aa ȳ her'oot ta tii: Rahapēē dāg né paawā baad hadoo do ta tyw n'aa, p'aa h̄enh raberéd h̄om tak'ēp hanām do P'op Hagā Do mejūū doo. Ti hyb n'aa ta tyw n'aa nahapāh do bah̄anh P'op Hagā Do rejāā da h̄ȳy k̄a sa h̄a. <sup>22</sup>Sa h̄a kametā dāk hah̄y pawóp hadoo do ji ky hetēg doo: “Awaar ad'ēēb jēng tehēen wāt do paah.”<sup>d</sup> “Too yb hasus do mah̄anh hehob wāt doo, p'aa h̄enh da tsapab gó takahep'ut.”<sup>e</sup>

### Jesus matēeh noo gó ky n'aa hah̄ȳh

**3** Najis haa, pawóp dāg bē ȳ ma erih do hah̄ȳh. Pooj jé bē ȳ ma erii wāt doo, hah̄y na-āāj h̄e bē ȳ wén ma erih, bē hyb n'aa esee hyb n'aa pooj jé kaher'oot do paah, baad ub bē hyb n'aa newēē hyb n'aa. <sup>2</sup>Ȳ karēn bē hyb n'aa esee p'ooj ub P'op Hagā Do ky n'aa rod tsyt h̄e ta w̄e kasēew bong do raher'oot do paah. Ȳ karēn bē hyb n'aa esee na-āāj h̄e Jesus, ēr Wahē N'aa, ēr h'yyb tym dēeb mejūū do paah, ajyy Kristo mejūū do bē w̄e heboo nā do bē h̄a ma met'ēeg wāt doo. <sup>3</sup>Taw'āāts h̄e baad bē bahapāh hah̄ȳh: Jesus matēeh do pooj jé ti abok da nesaa do sa h'yyb karēn do jawén habok doo, Jesus matēeh do ky n'aa rawajehēt doo. <sup>4</sup>Hah̄ȳ da d' sa kyyh: “Matēeh m̄ah, taky dāng paah. Te hub tado bā, ny tawāt? Bē hegāā”, nāk, “ēr wahē n'aa ēr pooj jé habong do dejēb k̄an. Ti hadoo né h̄e, paa hado had'yyt h̄e. Dooch takaja bā tamatēeh do pooj jé metēē n'aa.”<sup>f</sup> Paa hado had'yyt h̄e badāk hah̄y kapahuuj wāt noo gó naa”, nāk da sa kyyh. <sup>5</sup>Dooch rakarēn bā rah'yy kadawuung bā, P'op Hagā Do ky haj'aa p'ooj ub w̄e kapahuuj wāt doo. Dooch rakarēn bā rah'yy kadawuung bā naēng bā naa k'āāts bawooj dāk do ganyyh doo, ta ky haj'aa. Naēng tetyn h̄om, bawooj dāk do banyy dāk hyb n'aa. <sup>6</sup>Dooch rakarēn bā rahyb n'aa es'ee bā naēng hag'yyp doo me P'op Hagā Do gawats'iik paa badāk hah̄y tapahuunh do paah, ta h̄a habong do sii h̄e.

<sup>d</sup> 2.22 Pooj jé reréd h̄om nesaa do ramoo bok doo, ta jawén p'aa h̄enh ramoo bok, tahanāng pé tii.

<sup>e</sup> 2.22 Pooj jé rakarēn Jesus awug h̄om nesaa do sa h'yyb gó hanāng doo, ta jawén p'aa h̄enh ramoo bok nesaa doo, tahanāng pé tii.

<sup>f</sup> 3.4 Matew tēg eh do 24 h̄a takerii dāk Jesus her'oot do takajaa do pooj jé metēē n'aa. Dooch ta ti kaja dāg sa nooh, ta ti rawén wajahēt Jesus matēeh do ky n'aa. Nanyw h̄e Jesus matēeh, ta h̄a h'yy ka'eeh do wób red'oo. Nanyw h̄e takanaja bā k̄a, ta wób raky sēm Jesus ky dāng do paah.

P'op Hagä Do ky haj'aa tii. <sup>7</sup>Wë, papÿÿj, kamarab, sagööh, badäk hahÿÿ da hë ji hapäh do P'op Hagä Do enyyw däk, tii d' P'op Hagä Do ky däng do hyb n'aa, tëëg hõõ me ragawatsik hyb n'aa. P'op Hagä Do enäm nä ta tii. Tagawats'iik noo gó kä, sahõnh hë ta hã waneh'ëeh do tagawatsiig kãn. <sup>8</sup>Bë mabaan manä hahÿ najis haa: P'op Hagä Do hã sét pénh né hë sét ta baab, miw ta baab. <sup>9</sup>Dooh P'op Hagä Do hyb n'aa p'eed bä taky däng do tamoo wät hyb n'aa, ta wób red'oo. Tii d' nado. P'op Hagä Do ky däng do tawén kanajaa nä, bë tahyb n'aa b'aah do hyb n'aa. Dooh né takarën bã gawatsik péh. Takarën sahõnh hë rah'yy kawereem, ta hã rah'yy ka'eeh hyb n'aa paawä. <sup>10</sup>Ti hadoo né hë, Tak'ëp Hyb N'aa Jawyk Do kajaa né da. Rah'yy kanapeet bã, raganadaa bã takajaa da. Ji ganada do hadoo hets'ëëk do kajaa. Ti hadoo Tak'ëp Hyb N'aa Jawyk Do kajaa doo. Nayyw hë wë gawatsik da, hawyp do hadoo. Sahõnh hë adëë bëeh da tak'ëp haju do haj'aa. Tii bã dewuh da. Badäk hahÿÿh, sahõnh hë ta hã hanäng do na-ääj hë P'op Hagä Do ky n'aa ety da tagawatsik hyb n'aa.<sup>g</sup>

<sup>11</sup>Tii da sahõnh hë P'op Hagä Do gawats'iik do hyb n'aa da, taw'ääts hë tsyt hë nesaa do mahãnh baad bë babok P'op Hagä Do wë. Taw'ääts hë P'op Hagä Do karën doo da bë babok, <sup>12</sup>baad bë gadaa nuuj jé Kristo kajaa doo, P'op Hagä Do ky däng do paah. Taw'ääts hë nayyw hë ta ti kajaa bë an'oo bã.<sup>h</sup> Ta ti noo gó kajaa bã kä, wë aooj jëng da. Sahõnh hë adëë bëeh da tak'ëp haju do haj'aa. <sup>13</sup>Sahõnh hë ta ti awäd né paawä, ëër, Jesus hã h'yy ka'eeh doo, ër gada wë papuuj, badäk hahÿ papuuj P'op Hagä Do ky däng doo da. Jääm hë baad hadoo doo, P'op Hagä Do karën doo da habok do sa panang tii.

<sup>14</sup>Ti hyb n'aa najis haa, ta ti bë gahëen do hyb n'aa, taw'ääts hë tak'ëp bë hyb n'aa tam'aah tak'ëp baad ub bë babok hyb n'aa, tak'ëp baad ub bë bahadoo hyb n'aa P'op Hagä Do hã. Tak'ëp bë hyb n'aa tamah, h'yyb nyw gó bë baboo had'yyt hë hyb n'aa ta wë, P'op Hagä Do bahapäh hyb n'aa. <sup>15</sup>Bë hyb n'aa newë hahÿÿh: H'yyb jawyg gó Tak'ëp Hyb N'aa Jawyk Do gada nä, nayyw hë takanajaa, ji kedëëb wät hyb n'aa banesaa hënh ji taky

<sup>g</sup> 3.10 Tahajaa na-ääj hë ji erii bã: "Badäk hahÿÿh, sahõnh hë ta hã kapahuuj wät do na-ääj hë aooj jëng da."

<sup>h</sup> 3.12 Ji ky n'aa etsëë, nayyw hë takajaa hyb n'aa. Ji h'yy kawareem P'op Hagä Do wë, takarën doo da had'yyt ji bawät hyb n'aa. Ji h'yy kahas'ääp Kristo ky n'aa ji mahüüm do hã, sahõnh hë badäk hahÿÿ bã habong do raky n'aa napäh hyb n'aa na-ääj hë, Peed hanäng pé tahyb n'aa péh, taw'ääts hë nayyw hë ta ti kajaa bë an'oo bã, tahe'ood bã.

n'aa etyy do mahãnh. Tii da na-ããj hẽ Paw-Ro, ẽr hỹj hadoo do ẽr kamahãn do bẽ tama erii wãt. Bẽ tama erii wãt P'op Hagã Do h'yy gan'yyh doo da ta hã. <sup>16</sup>Ti ky n'aa né hẽ tama erii wãt sahõnh hẽ tama erih do hã. Tama erih do mahang ti anãng hãd hejooñh doo, tak'ẽp ji hyb n'aa manatakã bã, dooh ji maa napẽẽ bã tahanãng pẽh. H'yy gatamah doo, h'yy keh'ỹt doo, rawareem Paw-Ro erii wãt doo. Ta see hadoo ta ky n'aa ran'oo bã. Tii da na-ããj hẽ rawareem P'op Hagã Do kyy kerih do wób. Sa daaj hẽ sa ky n'aa katakyyk baad nadoo do hã. <sup>17</sup>Ta ti bẽ hapẽẽ dãk do hyb n'aa, najis haa, taw'ããts hẽ bẽ hyb n'aa matakã, ta s'ee hẽnh P'op Hagã Do ky n'aa jaw'yyk do ky nadah'eeh do bẽ rah'yyb mahũũm mahãnh te hub nadoo do rama metẽek doo me. H'yy kanehỹd né paawã bẽ da hẽ, sa kyyh bẽ maa newẽ bã, bẽ da h'yy kah'ỹt. Ta tyw n'aa baad hadoo do bẽ erét da sa kyyh bẽ maa newẽ bã. <sup>18</sup>Taw'ããts hẽ P'op Hagã Do kyyh hã bẽ hyb n'aa matakã had'yyt hẽ, Jesus Kristo, ẽr Wahẽ N'aa, ẽr h'yyb tym dẽeb bẽ wẽ taky enyym do takahũũm had'yyt hẽ hyb n'aa, baad Kristo bẽ bahapãh hyb n'aa na-ããj hẽ bẽ h'yyb gó. Taw'ããts hẽ ti né hẽ ji j'aa etsẽẽ had'yyt hẽ! Ỹj. Tii d' né hẽ. Taw'ããts hẽ. Jããm hẽ kã.